

**Date – 22/03/2026**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. Sorkar hnathawk pension zinga MUHCS 2.0 zawmte'n an kawppuite inenkawlna bak an bill thei tawh dawn lo.
2. Mizoram Maintenance of Household Registers Bill, 2019 chu sorkar laipui pawmpui theih tura en that leh mek a ni.
3. NIA-in tun hnai a Mizoram a dan kalha lut a Myanmar a lut chho zui a puha an mante chu Lengpui tumhmun atanga lo lut an ni lo.
4. Tun dinhmunah Prime Minister Narendra Modi-a chu India politics chanchina mipui thlan sorkar kaihruiatu nihna chelh rei thei ber a ni.

<><><>

**MUHCS**

Sorkar hnathawk pension zinga MUHCS 2.0 zawmte'n an kawppuite inenkawlna bak an bill thei tawh dawn lo.

Finance Department thuchhuah tarlan danin, MUHCS 2.0 ah pensioner scheme hian chhungkaw member zawng zawng huam tawh lovin, pensioner leh an kawppuite chauh a huam tawh dawn a. An chhungkaw member dangte chu mipui nawlpui (General Beneficiary Category) hnuaiah an inziah luh ve a ngai tawh dawn a. Nupa-a Mizoram Sorkar hnuaia Pensioner ve ve chuan an pahnihin a hrana MUHCS 2.0 hi an zawm a ngai tawh dawn a ni. MUHCS 2.0-ah hian pensioner-te chuan an duhthlanna hmangin MUHCS hi an zawmin an zawm lo thei a, a zawm duh chuan thla tin subscription fee Rs. 1,000 pein an zawm thei a, MUHCS zawmte chuan kum khat chhungin damlo in enkawlna atan cheng nuai 12 thleng an Bill thei a, Private Ward-ah an awm thei dawn bawk a ni. Pensioner ten MUHCS 2.0 an zawm duh lo a nih erawh chuan CCS (P) Rules, 1972 in a phal angin Medical Allowance an hmuh thin chu an dawng chhun zawm ang a, amaherawhchu, MUHCS 2.0 hnuaia hamthatna erawh an dawng ve thei dawn lo a ni.

He ruahmanna hi tha thar April ni 1 atanga hman tan tur a ni.

**(Corr: nuteii)**

<><><>

**MAMIT REVENUE**

Mamit District Land Revenue and Settlement pisa-ah an hotu ber Assistant Commissioner Revenue (Settlement Officer tih thin) a awm loh avangin department dawr tu mipuite'n harsatna an tawh chho mek.

Mamit a kan Corr sawi danin District Land Revenue and Settlement pisa-a an hotu ber Assistant Commissioner chu tun thla March ni 13 khan Saitualah sawn a ni a. A thlaktu tur hi vawiin thlengin a la awm lova, a thlaktu tur awm loh laia a aiawhtu tur dah a nih bawh si loh avangin LSC, House Pass, Periodic Patta, Garden LSC leh pass dangte pawh a lak theih loh bakah renew pawh a tih theih loh avangin mipui ten harsatna an tawh nasa hle a ni. District Revenue pisa hian Mamit district chhung khaw 17-ah LSC leh House Pass a pe chhuak a, heng khua atanga LSC leh House Pass thar la chhuak duh leh renew duh te bakah district chhung hmun hrang hrang atanga Periodic Patta leh pass dang la duhte tan Assistant Commissioner emaw a aiawh emaw an awm loh avangin engmah a tih theih lova,hei vang hian department dawr tum a kal thlawn mi tam tak an awm a ni.

Tum dangah chuan Mamit Land Revenue and Settlement department, Assistant Commissioner an sawn reng rengin a aiawh tu tur Mamit bawrhsap pisa atangin officer dah thin a ni a. Tun tumah hian aiawhtu tur dah a nih loh avangin mipuiin harsatna an neih phah ta niin kan Corr chuan a sawi a ni.

**(RD Darthanzauva, PTC Mamit)**



**BILL**

Mizoram Maintenance of Household Registers Bill, 2019, March ni 18, 2019 a Mizoram Legislative Assembly-in a pawm tawh hnu chu sorkar laipui pawmpui theih tura en that leh mek a ni.

Tun Assembly inkhawm zawh taka Congress member Pu C. Ngunlianchunga zawhna ziaka chhangin GAD changtu Chief Minister Pu Lalduhoma chuan Mizoram chhunga chhungkaw dinmun chhihchhiaha dan - Mizoram Maintenance of Household Registers Bill, 2019 chu,kum 2019-ah Assembly-a pawm a nih hnu-ah larsap pawmpui tura thawn a nih thu a sawi a. Larsap chuan India Constitution article 200-na tlawhchhanin pawm ta mai lovin September ni 12, 2019 khan President pawmpui turin a thawn ta a ni a ti. Hemi hnu hian Ministry of Home Affairs nen indawr chhonzawm reng a nih thu leh he bill hi pawm thuai a nih theih na'n Union Home Minister hnenah DO letter tum 4 thawn a ni tawh a ti a. Central Sorkar hian he bill hi State Assembly thuneihna piah lam a nih thu sawiin, ennawn leh turin thurawn a rawn pea, Bill hi Sorkar laipui atang hian paih a ni ta a ni a ti bawh.

State thuneihna-in a huam chin en that leh siam that ngaite siam that hna thawh tur hian Drafting Committee for the Mizoram Maintenance of Household Registers Bill, 2026 chu kumin February ni 25 khan din a ni a. Central sorkar pawm theih tur zawng leh state thuneihna-in a huam chin anga siamthat ngaite siamtha tura buaipui mek a nih thu Chief Minister chuan a sawi ani.



## ANGLING

Zirtawpni leh Inrinni khan Tlawng Sihmui Kai-ah Nghakuai Chiah Runpui huaihawt a ni.

Fisheries Department, Sihmui Branch YMA leh Mizoram Angling Association tanghovin Nghakuai Chiah Runpui hi a vawi hnihna atan an buatsaih a. Khua a that loh avangin beisei angin nghakuai chiah an tam lo na a, kum hmasa lam ai-in sangha hi an man hnem zawk a. Sangha man lian ber chu Malsawmtluanga, Aizawl Salem Veng niin kg 6 leh gram 825 a rit a man a. Sangha man hnem ber R. Lalrinsanga, Tuithiang Veng chuan sangha 8 a man ani.

A kharna inkhawm hi Fisheries Department Secretary Pu Lalrothanga hovin Inrinni khan buatsaih a ni a, Pu Lalrothanga chuan sangha leh luidung nungcha te humhalh a pawimawhzia sawiin, hemi ti tur hian nungcha humhalh mai bakah luidung te a bawhlawh loh na'n humhalh tel a tulani ati a, bawhlawh leh thli te luidunga a luh loh na'n mitin fimkhur turin a chah a ni. Inkhawm kaihruaitu Fisheries Department Director Pi Zonuntluangi chuan dan lova sangha man a that loh dan leh hrem theih a nih thute a sawi a. Sihmui Branch YMA Secretary in report pein, Mizoram Angling Association President in thu a sawi bawk.

Luidung nungcha te hi bomb, dynamo leh tur chi hrang hrang hmanga hrai a mante chu pawisa chawi leh lung in tan thlenga hrem theih a nih avangin Fisheries Department chuan luidung nungchate humhalh theuh turin mipuite a ngen a ni.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## NIA CASE

National Investigation Agency (NIA)-in tun hnai a Mizoram a dan kalha lut a Myanmar a lut chho zui a puha an mante chu Lengpui tumhmun atanga lo lut an ni lo.

Police leh Subsidiary Intelligence (SIB) hotute'n Akashvani News Aizawl an hrilh danin NIA-in tun hnai a an man Ukrainian 6 leh American 1 te chu thlawhna hmanga Mizoram a lo lut an ni thei lo niin an sawi a. NIA hian ramdang mite hi phalna nei lova Mizorama lut niin an sawi a. Ramdang mi Mizorama lo lut turte chuan Ministry of Home Affairs atangin Protected Area Permit (PAP) an lak ngei ngei a ngai a. Lengpui tumhmuna ramdangmi lo lutte reng reng chu PAP an neih leh neih loh endiksakin a nei lo chu thawn let leh tur an ni an ti. He tih lai hian report pakhatah chuan ramdang mi 7-te hi Assam atangin Vairengte-ah India mi anga insawi-in eng tin tin emaw an lut ni a rin a ni a. Inner Line Permit (ILP) lem hmanga lo lut an ni em tih chhui chian mek a nih thu an sawi. Assam atanga lo lut an nih loh

pawhin state thenawm atangin an lo lut em tih chhui zui mek a nih thu Police hotute chuan an sawi bawk.

NIA-in he'ng ramdang mite hi Mizoram lutin Myanmar a Chin state an lut chho ni a sawi chu finfiahna a la awm lo niin Mizoram Police hotute chuan an sawi a. Chin state a sipai sorkar dotu ralthuam keng pawlte chu ralthuam hman leh drone hman dan an zirtir a, drone pawh Europe atanga tam tak tawlh lut chhovah NIA chuan an sawi bawk a. Hei pawh hi a finfiahna an la neih loh thu Police lam chuan an sawi a ni.



**OIL**

Centre for Environment & Social Justice (CESJ) chuan Myanmar lama tuialhthei tawlh ruk titawp turin Supply Minister Pu B. Lalchhazova an ngen.

Thu chhuah siamin CESJ chuan tunlai khawvel boruak thlirin tuialhthei leh gas-ah harsatna a thleng chho mek a, India sawrkar pawhin harsa takin a theih ang angin a chaw lut hram hram a ni an ti a. Harsatna lian zawk thleng thei reng leh Mizoram pawhin tuar nghal thut thei reng a nih bawk avangin Mizoram atanga Petrol pump hrang hrangte'n Myanmar lama lut tur tuialhthei an pek chhuah chu tih tawp rih ni se an duh thu an sawi a. Supply Minister chu hemi khuahkhirh tur hian thupek khauh tak chhuah a, a kenkawh hna pawh khawng taka a kalpui an phut tlat thu an tarlang a ni. Supply Minister hnena Myanmar rama tuialthei tawlh ruk titawp tura ziaka ngenna an thehluh bakah hian a copy hi department secretary leh director bakah district tin bawrhshapte an thawn bawk a ni.

CESJ pawl hruaitu Ruatfelna Nu chuan bur emaw, barrel emaw hmanga tuialhthei ram danga phurh chhuah hi Essential Commodities Act kalh tlat a nih bawk avangin dan kalh a sumdawna hi tih tawp a nih ngei theih na'n sawrkar hi hma la turin an ngen thu a sawi a ni.



**PRISONERS**

Economics and Statistics Department in a tarlan danin kum 2024-2025 chung khan Central Jail leh District jail hrang hrang-ah lungin tang mipa 3,733 leh hmeichhia 828 an awm.

Tang zinga tang tam ber chu ND&PS Act thubuai awrh niin, mipa 1,149 leh hmeichhia 525 tang an awm a, rukruk vanga tang in a dawtin, mipa 1,263 leh hmeichhia 55 tang an awm a ni. Chhinchhiah danin, kum 2024-2025 khan pawngsual thubuaia tang mi 106 awm zingah hmeichhe 2 an tel a, tualthahna thubuaia, tang mipa 54 leh hmeichhia 6 an awm bawk . Dan kalha ralthuam kawlh khapna dan Arms Act avanga tang mipa 52 leh hmeichhia 2 an awm a, midang hliam leh tihnat thubuaia ,tang mipa 100 leh hmeichhia 8 an awm bawk a ni.



## **MODI ACHIEVES MILESTONE**

Prime Minister Narendra Modi-a chu India politics chanchina mipui thlan sorkar kaihruaitu nihna chelh rei thei ber a ni ta a, tun dinhmunah Gujarat Chief Minister leh Prime Minister nihna a chelh chhung belhkhawm hi ni 8931 a ni a, ti hian ni 8930 chhung Sikkim Chief Minister nihna chelhtu, Pawan Kumar Chamling-a a khum ta a ni.

Pu Modi-a hi kum 2001, Oct. ni 7-ah Gujarat Chief Minister atan lak luh niin kum 2014, May ni 21 thleng, Chief Minister nihna hi a chelh a, May 26, 2014-ah Prime Minister 14-na ni turin lak luh a ni a, Independence hnua piang Prime Minister hmasa ber a ni bawk.

Tun dinhmunah Pu Modi-a hian YouTube channel-ah subscriber maktaduai 30 nei tling tawhin khawvel ram hruaitu zinga subscriber nei ngah zingah a lang pha a, Feb thla khan Instagram-ah follower maktaduai 100 chuang neiin khawvel ram hruaitu leh politician, he platform-a hetiang zat follower nei thei hmasa ber a ni a, X platform-ah follower maktaduai 106 leh nuai 4 a nei mek bawk a ni.

<><><>